

每週經課朗誦經文(巴克禮台語漢字)2014/11/23

共同經課 - 1 以西結書三十四章十一節~十六節，二十節~二十四節

11 「因為主耶和華按呢講：看啊，我，我欲本身尋我的羊，來尋著伊。12 牧者佇羊群四散的日子怎樣尋我的羊，我也欲親像按呢尋我的羊。諸個羊佇密雲黑暗的日子四散到逐所在，我欲對遐救in倒來。13 我欲對列國中導in出，對逐國的內面聚集in，導in倒來in的本所在，也欲佇以色列山諸個溪邊、境內一切通倚起的所在，來養飼in。14 我欲佇好好的草場養飼in。in的羊寮(tiâu)欲佇以色列高位的山，in欲佇好好的羊寮(tiâu)內倒啲暍，也佇以色列山肥媯的草場食草。15 主耶和華講：我欲本身養飼我的羊，互in倒啲暍。16 失落者，我欲尋伊；受趕逐者，我欲導伊倒來；受傷者，我欲包伊；破病者，我欲醫治伊；獨獨肥者，勇者，我欲除滅伊，也欲秉公養飼in。20 「所以，主耶和華對in按呢講：看啊，我本身佇肥的羊及瘦的羊的中間行判斷。21 因為恁用身軀用肩頭夾in，用恁的角觸破病者，致到互in四散佇外面。22 所以，我欲拯救我的羊群，無閣做受搶的物；我亦欲佇羊及羊的中間行判斷。23 我欲設立一個牧者照顧in，伊欲養飼in，就是我的奴僕大衛。伊欲養飼in，做in的牧者。24 我——耶和華欲做in的上帝，我的奴僕大衛欲佇in的中間做首領。這是我耶和華講的。

共同經課 - 2 詩篇一百篇

1 [感謝的詩。] 全地著向耶和華出歡喜的聲！2 恁著歡喜的心服事耶和華，唱歌來到伊的面前！3 恁著知耶和華是上帝！咱是伊創造的，咱亦是伊的；咱是伊的百姓，亦是伊草場的羊。4 著用感謝入伊的門；用謳佬入伊的院。著感謝伊，謳佬伊的名！5 因為耶和華是好。伊的慈愛到永遠；伊的信實到萬世代。

共同經課 - 3 以弗所書一章十五節~二十三節

15 因為按呢，我既然聽見恁中間佇主耶穌的信，及顯出佇眾聖徒的仁愛，16 就為著恁感謝無息。祈禱的時數念恁，17 求咱的主耶穌基督的上帝，榮光的父，賞賜恁智慧啟示的神，來深識上帝，18 恁的心目得著光明，互恁知伊召人所向望的是怎樣，伊的業佇聖徒中榮光的富有到怎樣；19 閣知伊的權能向佇咱諸個信的人大到怎樣，20 照伊前所曾行佇基督大權能大氣力的功用，互伊對死人中復活，佇天裡坐伊的大旁，21 搬(pôa")過攏總辦政事的、掌權的、才能的、治理的，及一切所號的名；毋若佇今世也佇來世，攏搬(pôa")過遠遠。22 閣互萬項有降服佇伊的腳下，閣將伊做管萬有的頭來賞賜教會。23 教會是伊的身軀，伊所充滿的，伊也是用萬有充滿萬有的。

共同經課 - 4 馬太福音二十五章三十一節~四十六節

31 「當人子佇伊的榮光，及攏總的天使來的時，伊欲坐伊榮光的座位。32 聚集萬邦佇伊的面前。伊就欲分別in，親像牧者分別綿羊離開山羊，33 將綿羊下佇伊的正旁，山羊下佇伊的倒旁。34 彼時王欲給正旁的講：『恁對我的父得著恩典的，進前來承接國，就是對創造世間以來給恁備辦的；35 因為我朽，恁曾互我食，我嘴乾，恁互我飲；我出外，恁互我住；我褪腹裊，恁互我穿；36 我破病，恁看顧我；我佇監裡，你來尋我。』37 彼時義人欲應伊講：『主啊，阮甚麼時看見你朽，來互你食，嘴乾，來互你飲？38 甚麼時看見你出外，來互你住，褪腹裊，來互你穿？39 甚麼時看見你破病，抑是佇監裡，來尋你？』40 王欲應伊講：『我實在給恁講，恁既然行伊佇我的兄弟至微細的的一個，就是行伊佇我。』41 閣欲給倒旁的講：『恁受咒詛的，著離開我！入永遠的火就是為著魔鬼及伊諸個使者所備辦的！42 因為我朽，恁未曾互我食，我嘴乾，恁未曾互我飲；43 我出外，恁未曾互我住；我褪腹裊，恁未曾互我穿；我破病，及佇監裡，恁未曾看顧我。』44 in亦欲應講：『主啊，阮甚麼時看見你朽，抑是嘴乾，抑是出外，抑是褪腹裊，抑是破病，抑是佇監裡，來無服事你啊？』45 伊就欲應伊講：『我實在給恁講，恁既然無行伊佇諸個至微細者的一個，就是無行伊佇我。』46 諸個人欲去入永遠的刑罰；若是義的人人永遠活。」